

Il film rumantsch independent

Cineastas e cineasts rumantschs da l'entschatta dal 21avel tschientaner

■ **Betg grond kino, mabain truvaglias preziasas. Mintg'onn realiseschan cineastas e cineasts rumantschs independents 4 fin 6 films documentars per RTR. Ils films da las auturas e dals auturs libers raquintan istorgias da chavels grischs e suns sonors, d'amicizias enfin mazzaments.** En in dossier realisà il 2018 preschenta RTR questas impurtantas vuschs cinematograficas. Ultra da quai cumpiglia questa preschentaziun da chattà infurmaziuns davart l'uniun Cineasts independents rumantschs ch'è sa furmada il 2007.

Christian Schocher

Christian Schocher è naschì l'onn 1946 e creschì si a Puntraschigna. Suentar la scola media evangelica a Samedan fa el in emprendissadi da fotograf a Cuir. Cun 21 onns surprinda el il Cinéma Rex a Puntraschigna che tutgava dapi il 1958 a ses bab. Il 2013 surdat el ses kino a mauns giuvens. Christian Schocher è autodidact. En ses emprim film «Corsin Fontana und seine Objekte» daventan ils objects da l'artist Corsin Fontana ils protagonistis dal film. Ses emprim film lung è «Die Kinder von Furna 1973–75. Il pli enconuscent film da Christian Schocher, «Reisender Krieger» (1981), vala enfin oz sco in'ovra singulara en l'istorgia dal film svizzer.

Tranter il 1998 ed il 2011 realisescha Christian Schocher ina trilogia per la Televisiun Rumantscha. Il 2015 obtegna el il Premi grischun da cultura. Christian Schocher viva a Puntraschigna, el è maridà ed ha quatter uffants.

Films realisads per RTR: «Paun jester ha siat crustas» (1998), «Giuvetegna dultsch utschi» (2002), «Egliadas» (2012).

Christoph Müller

Christoph Müller, naschì l'onn 1950 e creschì si a Turitg. A l'università da Turitg studegia el psicologia sociala. Dal 1977 fin il 2012 lavura Chrisoph Müller tar SRF, tranter auter sco correspondent a Moscau, sviluppader da program, manader da la redacziun 10vor10, autur e manader da la redacziun Reporter e DOK. Christoph Müller è maridà, el viva a Turitg ed ha trais figlias.

Film realisà per RTR: «Novitads da la rusna» (2014).

Claudia Knapp

Claudia Knapp è naschida l'onn 1955 e creschida si a Scuol. Suentar la matura e studis da romanistica ed istorgia d'art a Turitg e Perugia avra ella ina galeria d'art contemporan svizzer ed american a Cuir. Il 1985 cumenza ella a lavurar tar la Televisiun Rumantscha so moderatura e

redactura. Ella è co-autura da l'emissiun Muschkito, l'emissiun satirica che lavura cun novs meds filmics. Ils onns 1994–1999 è ella l'emprim redactura ed alura producenta tar la Rundschau da SF.

Il proxim pass maina ella en tut in'otra direziun. Claudia Knapp daventa co-directura da l'Hotel Therme Vals, in hotel cun 150 collavuraturAs, 280 letgs e 3 restaurants. Sper la lavur da direziun concepescha e realisescha ella programs culturals. Suentar in sabbatical il 2004 constituescha ella la Fundaziun NotVital, ina chasa da cultura cun colleziuns d'art e biblioteca rumantscha. Dapi il 2007 lavura ella sco freelancera sin il champ schurnalistic e cultural e dapi il 2012 è Claudio Knapp er producenta d'iteli d'ulivas a Dolceaqua/Liguria.

Film realisà per RTR: «La principessa da Samedan» (2016).

Gieri Venzin

Gieri Venzin è naschì l'onn 1959 e creschì si a Sedrun. Suentar la matura a la Scola claustrala da Mustér studegia el istorgia svizra, politologia e litteratura tudestga a Berna e Freiburg im Breisgau. Il 1985 cumenza el tar Radio Rumantsch sco stagiaire, daspera fa el la scola da schurnalism al MAZ a Lucerna. Dal 1986 fin il 1992 lavura Gieri Venzin tar Radiotelevision Svizra Rumantscha, a l'entschatta per il radio, silsuentar per la televisiun nua ch'el realisescha contribuziuns per la Svizra Rumantscha e Muschkito. Il 1993 sa renda el a Turitg tar la Televisiun Svizra (SF) e lavura per las redacziuns Time Out, Netz Natur e Schweiz Aktuell. 2002 fundescha Gieri Venzin sia firma da produziun monte films cun sedia a Sedrun. Dapi lura lavura el parzialmain per l'emissiun DOK a Turitg, e sco cineast independent fa el films per RTR, SRF, ARTE e Spiegel TV.

Dal 2003 fin l'avertura da la NEAT il 2016 ha Gieri Venzin observà ed accompagnà filmicamain las lavurs ed ils midaments en la Val Tujetsch. Il resultat èn tschintg films, «La ruosna 1–5» per RTR ed il film documentar «Unten durch – die Sedruner und der Gotthardtunnel» per SRF. Gieri Venzin ha dus figls e viva a Turitg, Trun e Sedrun.

Films realisads per RTR: «Condrau» (1998), «Puscha! Puscha! Tut che cloma – historia dalla vacca brina» (2000), «Onna Maria – cronica d'in mazzament» (2001), «Alfons Maissen – ina veta pil vargau» (2001), «Il temps tut auter che buns» (2002), «La ruosna 1–5» (2003–2016), «Jeu fuss morts: Ursicin G.G. Derungs – staus pader e maridaus» (2005), «Il tarlich dil cletg» (2006), «Tutto bello – cronica d'ina vendetga» (2007), «La chantadura tschocca» (2011), «O schei vus caras steilas – ina stad cun cantus firmus Sur-



Cineastas e cineasts rumantschs – u l'otra perspectiva.

FOTO: PD

selva» (2012), «Il credo da Clau Scherrer» (2012), «Il clom dalla pezza» (2013), «Il misteri da Bargun I e II» (2014/2015).

Susanna Fanzun

Susanna Fanzun è naschida l'onn 1963 e creschida si a Tarasp. L'onn 1986, suenter il seminari da scolasts, cumenza ella a lavurar sco schurnalista tar il Radio Rumantsch. Trais onns pli tard mida ella tar la Televisiun Rumantscha nua ch'ella lavura sco redactura, moderatura e producenta. Dal 1997 fin il 2013 realisescha ella numerus films documentars per ils Cuntrasts. Ses temas preferids en la vita da mintgadi en las alps e purtrets d'artists. Davent dal 2003 è ella schurnalista da video. Cun ses films è ella stada diversas giadas preschenta als Dis da film da Soluturn e tar plirs festivals internaziunals da film.

Il 2012 fundescha ella si'atgna firma da produziun, la Pisco Pictures Scrl. Dapi il 2014 lavura Susanna Fanzun sco reschissura e producenta independenta. Ses emprim film da kino, «Kühe, Käse und 3 Kinder», ch'ella realisescha il 2015, vegn distribuì da Frenetic Films en ils kinos Svizzers.

Dapi il 2017 è Susanna Fanzun presidenta da la gruppa d'interess Cineasts independents rumantschs CIR. Susanna Fanzun viva a Scuol, ella è maridada ed ha ina figlia ed in figl.

Film realisà per RTR: «Lana» (2016).

Manfred Ferrari

Manfred Ferrari è naschì l'onn 1963 e creschì si a Schlarigna. Suentar in curt intermezzo a l'Universitad da Berna visita el las scolas d'art a Sion e Turitg. Il 1986 sa chasa el a Cuir e gudogna ses paun da mintgadi sco artist. Dasperas è el schurnalista da radio, graficher e lavura sco decoratur da tribuna, illuminader ed assistent da reschia en il teater da la citad da Cuir. Dapi il 1991 è Manfred Ferrari cineast e reschissur da teater independent. El è confundatur da la gruppa da teater «ressort k». Sut sia batgetta daventa la Postremisa a Cuir il 2006 in nov spazi cultural. Manfred Ferrari viva a Cuir ed ha dus uffants.

Films realisads per RTR: «Luvrers da glatsch» (1997), «L'archiv» (1999), «Pastiziers – zücher, aventura ed increchantüm» (2004), «Play / Don't play» (2005), «Dissegnar musica» (2007), «Ir via» (2009), «Chausa da famiglia» (2016).

Hercli Bundi

Hercli Bundi è naschì l'onn 1964 e creschì si a Cuir. Suentar la matura studegia el reschia e film a l'École cantonale d'art de Lausanne ECAL. Plinavant fa el la scolaziun da producent tar Eurodoc e

tar Sources 2. El realisescha sez films sco autur e reschissur, è dentant er producent da films cun la societad Mira Film. Il film «Die Frau mit den 5 Elefanten» produci da Mira Film ha gudagnà il 2010 il Quartz – Premi dal film svizzer sco megljer film documentar. Hercli Bundi viva a Basilea.

Films realisads per RTR: «Senza televisiun» (1997), «Luvrers da glatsch» (1997), «Not Vital – half man, half animal» (2000), «Marchesa» (2011).

Menga Huonder-Jenny

Menga Huonder-Jenny è naschida l'onn 1965 e creschida si ad Andeer. Suentar la matura d'economia a la Scola chantunala grischuna fa ella il diplom d'actura a l'Universität für Musik und darstellende Kunst a Graz en l'Austria. Dal 1992 fin il 1997 studegia ella a la Deutsche Film- und Fernseh-Akademie Berlin DFFB. Dapi lura è ella activa sco reschissura e cineasta. Sco reschissura ha ella tranter auter inscenà il 2013 «rAmurs – Lärm und Liebe im Schams», in gieu liber da Silvio Huonder. Menga Huonder-Jenny è maridada, ha dus figls e viva damanivel da Berlin.

Films realisads per RTR: «Dunnas a chatscha» (2003), «Il verd a Berlina» (2004), «In sigl or en la vita» (2011), «Fa far musica intelligent» (2013), «Dar color – mussar color» (2017).

Ivo Zen

Ivo Zen è naschì l'onn 1970 e creschì si a Sta. Maria en Val Müstair. Suentar la matura a la Scola chantunala a Cuir studegia el architettura a l'ETH, Turitg. Il 2003 fa el il diplom da l'Ecole Supérieure des Beaux Arts Genève per film e video. Ils onns 2010–2017 è Ivo Zen president da la gruppa d'interess Cineasts independents rumantschs. Dapi il matg 2018 fa el part da la supranza da l'Associaziun svizra reschia e scenari da film. Il 2016 realisescha el ses emprim film documentar da kino «Zaunkönig – Tagebuch einer Freundschaft». Ivo Zen abitescha a Turitg, el è maridà ed ha dus uffants.

Films realisads per RTR: «Pizzet» (2004), «Mes emprim onn en il convict» (2008), «Films d'amateurs – amateurs da film» (2010), «In'experientscha musicala» (2014), «Esser da chasa – quatter dunnas da Sent» (2015).

Christina Caprez

Christina Caprez è naschida l'onn 1977 e creschida si en l'Argovia sco figlia d'ina mamma tudestga e d'in bab grischun. Suentar il studi da sociologia, etnologia ed istorgia ha ella lavurà indesch onns tar il radio SRF 2 Kultur. Oz scriva ella la biografia da sia tatta, l'emprima plevonessa grischuna Greti Caprez-Roffler

e lavura sco schurnalista libra e moderatura. Christina Caprez viva a Zollikon ed ha ina figlia.

Film realisà per RTR: «Gisula Tscharner – la terra pli datiers ch'il tschiel» (2017).

Aline Suter

Aline Suter è naschida l'onn 1982 e creschida si a Geneva; la lingua da famiglia è rumantsch. Durant si'entira uffanza ed er pli tard visita ella regularmain sia tatta a Domat. Suentar la matura artistica en arts visualas studegia Aline Suter a Geneva, Barcelona e Berlin, e cuntanscha 2006 il master en «des lettres en histoire du cinéma». Ella lavura tar differents festivals da film en Svizra ed en Frantscha, sco programadra e sco at-tasché da pressa. Plirs onns ha ella manà in atelier da video en in'instituziun per impedids.

Il 2013 realisescha ella ensemen cun Céline Carriroit ses emprim film per RTR Canorta. Il film è in'avischinaziun intima a sia lingua materna, il rumantsch. Il film «Resuns/Echos», realisà il 2014, medemamain cun Celine Carriroit, raquinta da la tschertga da l'identitad rumantscha e dal sun rumantsch. Aline Suter è maridada e mamma da dus uffants.

Film realisà per RTR: «Canorta – Resuns dad in viadi rumantsch» (2013).

Cineasts independents rumantschs

L'uniun Cineasts independents rumantschs (CIR) è sa furmada l'avust 2007. L'uniun s'engascha per stgaffir cundiziuns da produziun che permettan da realisar films independents en lingua rumantscha per la televisiun ed er per il kino. Ella represchenta ils auturs en dumondas strategicas e praticas e sa chapescha sco organ da comunicaziun envers la SRG. La finamira è d'augmentar la qualitat dal film rumantsch e d'al render pli visibel er sur ils cunfins culturals e linguistics ora.

A ses commembers porscha la CIR cussegliaziun e sustegn en tut las dumondas che regardan la produziun d'in film. Ella vul esser in organ da lobbying e da comunicaziun e vul permetter als auturs rumantschs da profiter da la ritgezza da las differentas experientschas a l'intern da la uniun. Dapli infurmaziuns sut www.cineasts.ch.

La preschentaziun:

Dossier «Cineastas e cineasts rumantschs independents».

Dapli infurmaziuns:

chatta.ch/?hiid=3163
www.chattà.ch

CINEASTS INDEPENDENTS RUMANTSCHS

actualitad
intent
l'uniun
commembers
daniel von aarburg
hercli bundi
jean-claude campell
martin cantieni
oliver conrad
christina caprez
susanna fanzun
manfred ferrari
jürg gautschi
carla hitz
menga huonder
claudia knapp
peter kreiliger
casper nicca
christian schocher
manuela steiner
aline suter
manfred zazzi
ivo zen

MARTIN CANTIENI
Creschì si a Sagogn, Scola chantunala a Cuir. Matura 2003. Lura seguì a l'ester: viadis en l'America dal Sid ed en l'Africa. 2009–2010 studi da film a la scola d'art «FF» – Schule für Kunst und Mediendesign a Turitg, realisà divers films curts e lavurs da fotografia en il rom da la scolaziun.
2010–2015 redactor da Radiotelevision Svizra Rumantsch: L'emprim tar il «Telesguard» lura tar ils «Contrasts».
Dapi l'onn 2015 studi da filosofia e rumantsch a l'Universitad da Turitg.
CONTACT
martin@cantieni.info


